

Sontje Henriquez a bira ganador absoluto di Aruvision 2006 na Rotterdam

DEN HAAG — Sontje Henriquez a bira e ganador absoluto di Aruvision 2006 cu su interpretacion di e hit di Juanes "La Camisa Negra". E di cauter edicion di Aruvision a tuma lugar den Dynamo Dans en Partycentrum na Rotterdam. E prome premio a keda entrega pa Minister Plenipotenciario sr. Frido Croes hunto cu sra. Sandra Kooi di Nos Raiz. E mandatario a presencia e evento aki acompaña pa su señora Lourdes Croes-Figaroa y su yui muher Joseanny Croes.

Na segundo lugar a keda Loufran Tromp cu e numero musical "Wowo di Cariño" di Izaline Calister. E di tres lugar a bai pa Solange Trimon cu e cancion "Amor Prohibido" di Selenia.

E edicion di Aruvision tabata dedica na sr. Roy Lint, mihor conoci como Lord Cachete. For di man di Jonathan

Viera Lord Cachete a ricibi un plakaat como muestra pa su contribucion na musica y cultura di Aruba. Lord Cachete a cumpli 25 aña den e mundo musical di Aruba y ta conoci pa su participacion na e Contest di Calypso y Roadmarch na Aruba. Aunque cu Lord Cachete te ainda no a bai cu e titulo di Calypso of Roadmarch King, algun di su roadmarchnan a pega duro durante di temporada di Carnaval, manera "Aruba Dushi Tera" y "Rocking around the clock". Lord Cachete a gradici e organisadoman di Aruvision cu ta Sonsito Croes y Jonathan Viera pa e reconocimiento aki y a bisa di ta contento pa a honor aki duna na su persona. Ela gradici tur hende cu a sostene durante di e ultimo 25 añanan y specialmente su mama cu a viaha for di Aruba pa comparti e momento importante aki cu



su yui. Un total di 13 cantante a participa, di cua dos a bin cu nan mesun composicion. E presentacion di e anochi aki tabata den man di Sonsito Croes y Darlene Falconi.

Aruvision Band tabata bou direccion musical di Derrick Huntington.

Despues di e presentacion di e cantantenan, tabata tin actuacion di entre otro Oslin

Trimon, y Jonathan Hoevertsz, ganador di Aruvision 2005.

Aruvision 2006 un biaha mas a resulta un exito grandi; un anochi netamente Arubano cu un atmosfera hopi placentero.

